


«Baselgia GR curt e bain»

Nov manual dal Corpus Catholicum cun tips pratics

■ (anr/gc) Dal Corpus Catholicum – quai è la baselgia catolica dal chantun Grischun – datti er ina buna nova. Ella ha edì da curt – ton per rumantsch sco talian e tudestg ed en tut 1000 exemplars – in manual sco ovra da consultaziun ed agid per las suprastanzas dals cumins-baselgia (plaivs). Mussà vegn co la baselgia catolica è structurada e tgi ch'è responsabel per tge. Concepi è il manual a moda simpla e concisa – gist sco il titel di – curt e bain. I sa tracta d'ina brochura survesaivla e fatga cun gust. Cooperà han pliras persunas ch'èn colliadas cun il Corpus Catholicum e la baselgia. Lur giavisch è ch'il manual daventia in mussavia per ils engaschads en la baselgia.

Cumin-baselgia, pravenda, baselgia chantunala e svizra

L'emprima part dat ina survista davart il cumin-baselgia (plaiv) cun ses organs e sias cumpetenzas, la pravenda e fundaziun ecclesiastica. I suonda la baselgia chantunala cun ses organs: Corpus Catholicum (legislativa), cumissiun amministrativa (executiva), las instituziuns da la baselgia chantunala, pastoraziun speziala e finanziaziun. Allegà vegn era



Frontispizi dal nov manual dal Corpus Catholicum.

MAD

l'investgieu da Cuira cun l'ordinariat, il vicariat general per il Grischun, cussegel episcopal e pastoral e la finanziaziun.

Tar las organisaziuns surchantunalas s'audan: La Conferenza da Biberbrugg (dals set chantuns da l'investgieu da Cuira), la Conferenza centrala roman-catolica e quella dals investgs svizzers. A la fin

èn mintgamai ils organigrams aschuntads.

L'incarica dal Corpus Catholicum

La baselgia catolica dal Grischun sustegna e promova en il Grischun las incumbensas da la baselgia catolic-romana. Ella n'è betg ina baselgia per propri, mabain in'organisaziun secundara che serve a la baselgia, fundada sin il dretg canonic e l'investg. Ella metta a disposiziun las finanzas – ensem cun las plaivs – per che la baselgia possa ademplir sias incaricas. Las fatschentas po la baselgia catolica chantunala reglar a moda autonoma, garantida en la costituziun chantunala. Ella resguarda las leschas da la baselgia catolic-romana, mo ha era dà a sasezza ina atgna costituziun.

Difficultads po i sa dar tar quel sistem dual. Entant ch'il dretg canonic è in urden ierarchic-ecclesiastic da surengiu (investgieu dal lieu, dal qual las pravendas èn dependentas), sa basa il dretg statal-democratic sin in urden da sutensi (la basa èn ils cumins-baselgia).

Tuttas duas varts ston sa dar fadia da chattar soluziuns cuminaivlas. Quai stat er en il manual. Ed uschia èsi (fissi) bun e vegn(iss) era ora bain.